

Meyara o phethagatša ditshepišo

Malapa ao a eteletšego pele ke bana ke karolo ya malapa ao Masepala wa Aganang o lekago ka gohle go a hlokomela le go a ema-ema go leka go kaonafatša maphelo a bana. Tšhumišano ya Makhanselara le setšhaba go hlatha malapa ao ke selo se bohlokwa seo se thušago go kaonafatša malapa ao. Le lengwe la malapa a, ke lapa la Ga-Sebola kua Mabopane. Lapa le le eteletšwe pele ke Lesogana la mengwaga ye 22 leo le ithutelago mphato wa Marema-Tlou. Ke lapa la bana ba 4, ebago wa mengwaga ye 22, 20, 18 le 16, gomme ka moka ga bona ba sale sekolong. Bana ba ba phela feela ka mphywa-feela wa mmušo gotšwa go b aba 3 ba bona.

Mmasepala wa Aganang o ile ngwagola wa ema-ema go netefatša gore bana bao ba amogela Ngwako wa RDP kgweding ya July nakong yage go ketekwa bophelo bja Tata Nelsen Mandela. Nakong yeo, Meyara wa Aganang Maria Mokobodi o tshepišitše lapa leo gore o tla fela a le etela kgafetša-kgafetša go thušana le lona. Meyara ka la 8 February 2016 o ile le boetapele bja Masepala ka lapeng le la Ga-Seloane goya go fana ka dijo le maele a setswadi.

Meyara o boletše gore go bohlokwa gore ditshepišo tšeo di dirwago setšhabeng di phethagatšwe.

“Re le badudi re swanela go kwelana bohloko, re swanela go thušana fao go kgonegago, gomme Masepala le ona o ikemišeditše go tsenya letsogo le go thuša ka dinakong tšohle. Malapa ao a hlokago, a hloka thušo ya rena ka moka. Ngwaga ka ngwaga bjalo ka Masepala re nale lenaneo la go thuša bana ba go swana leba, gore le bona ba swane le bana ba bangwe kudu nakong ya maikhutšo a mafelelo a ngwaga. Re thušana le Makhanselara a rena go fana ka dijo le go lebelela dinyakwa tše dingwe tša ditšhiwana.”

“Lehono re tshepiša lapa la Ga-Sebola gore kantoro ya rena ya Free Basic Services e ya go šoma ka thata go netefatša gore ba Ga-Seloane ba hwetša mohlagase wa go se lefelwe”.

Yvonne Sebola wa mengwa ga ye 18, yoo ebago lekgarebe ale nnoši magareng ga bašemane ba 3, o re ga go bonolo go phela o sena batswadi kage bophelo bo nale dinyakwa tše dintšhi tšeo ngwana a swanelago go di fiwa ke motswadi.